

Rhyw fora Mawrth ym mis Mehefin

Petai rhywun yn gofyn beth oedd y profiad mwyaf cofiadwy i mi yn ystod gwyliau'r haf eleni, heb os nac oni bai, fe ddywedwn mai fy ymweliad â Genefa ym mis Mehefin oedd hwnnw, ac yn arbennig yr hyn a ddigwyddodd i mi ar fore dydd Mawrth yr wythnos honno. Fel y gŵyr darllenwyr selog y *Goleuad*, mae eleni yn flwyddyn dathlu pum can mlwyddiant geni John Calfin, ac roedd fy ymweliad â Genefa yn cydfynd â'r dathlu hwnnw. Wedi mynychu oedfa'r dathlu ar fore Sul yn eglwys Sant Pedr a mwynhau taith gerdded o amgylch yr hen ddinas, dyma benderfynu mynd i chwilio am fedd John Calfin.

Prin bod swyddfa dwristiaeth y ddinas wedi agor ei drysau fore Mawrth pan gerddais i mewn a holi am leoliad y fynwent. Gallasech feddwl fy mod wedi holi'r ffordd i'r lleuad gan i'r ferch sylfu'n hurt arnaf a chyfaddef na wyddai'r ateb i'r cwestiwn ac nad oedd neb o'r blaen, hyd y gwyddai, wedi holi am fedd y gŵr enwog hwn. Diflannodd i un o stafelloedd cefn y swyddfa a dychwelyd ymhen ysbaid a gwên fawr ar ei hwyneb, yn amlwg yn falch ei bod yn gallu fy nghynorthwyo. Agorodd blygiadau map a dangos lleoliad y fynwent i mi gan egluro ei bod rhyw waith tri chwarter awr o gerdded o'r swyddfa. Dilyn yr afon wedyn a chroesi un o'r pontydd niferus, troi i'r dde ac yna i'r chwith ac fe ddylwn fod wedi cyrraedd pen y daith

Cyn dim roeddwn yn sefyll y tu allan i borth y *Cimetière de Plainpalais*, yn falch o fod wedi canfod y fynwent yn weddol ddiraffferth. Roedd hi'n fore hyfryd a'r haul yn danbaid, a'r beddau niferus fel tudalennau cyfrol drwchus o hanes yn ymagor o flaen fy llygaid ac yn fy ngwahodd i'w darllen fesul un ac un. Hon, yn amlwg, oedd un o brif fynwentydd Genefa a gorffwysfan nifer o'i henwogion ar hyd y canrifoedd. Ond beth am John Calfin? Wyddwn i ddim ble i gychwyn

chwilio am ei fedd. Tra'n cerdded rhwng y beddau, daeth merch ifanc i'm cyfarfod a dyma fentro'i holi, ond yn amlwg doedd hi erioed wedi clywed am John Calfin, a pharodd hynny rhyw anniddigrwydd ynof. Cofio am O.M. Edwards yn ei gyfrol enwog 'Cartrefi Cymru' ar ei ffordd i Gefn Brith, ac yn holi heddegidwad am y ffordd. Ond Sais ydoedd heb unrhyw grebwyll am hanes Cymru, a Chefn Brith a John Penri yn enwau hollol ddieithr iddo. Efallai nad yw'r gymhariaeth yn un hollol deg, ond yn sicr doedd enw John Calfin hyd yn oed yn fy acen Ffrangeg garbwl i yn golygu dim i'r ferch ifanc a gyfarfum yn y fynwent y bore hwnnw. Cerdded ymlaen wedyn ar hyd y llwybr a sylwi ar ŵr yn torri coed yn y pellter, a dyma fentro eto. A llwyddo! Doedd ganddo nemor ddim Saesneg na finna chwaith fawr o Ffrangeg, ond dealodd fy mwriad, a dangosodd y bedd i mi. O'r holl feddau yn y fynwent, hwn oedd y mwyaf di-sylw ohonynt i gyd. Carreg fach a'r llythrennau 'JC' wedi eu cerfio arni a gofnodai fan ei gladdu, a ffrâm haearn o'i amgylch. A dyna'r cyfan. Dyna mae'n debyg oedd dymuniad John Calfin ei hun. Ond efallai nad yw hynny 'chwaith yn hollol wir; oherwydd ei wir ddymuniad oedd cael ei gladdu mewn bedd di-enw, a



hynny oherwydd nad oedd am dderbyn unrhyw glod iddo'i hun, ddim hyd yn oed wedi'i farwolaeth. Does na'r un gofeb na cherflun iddo yn Genefa nac yn unman arall o ran hynny, ar wahan i honno sydd ar Fur y Diwygwyr, ac yntau yn un o bedwar yn y fan honno. Efallai nad oes sicrwydd 'chwaith mai yn y bedd bach di-nôd hwn yn Genefa y claddwyd prif ffigwr y Diwygiad Protestannaidd yn Ewrop. Ond i mi, ni wna hynny ond grymuso'i neges, a geiriau'r Pêr Ganiedydd ddaw i'r cof:


Ymgrymed pawb i lawr
i enw'r addfwyn Oen,
yr enw mwyaf mawr
erioed a glywyd sôn:
y clod, y mawl, y parch a'r bri
fo byth i enw'n Harglwydd ni

(Cff. 312)

Bûm yn eistedd ar fainc gyfagos am beth amser, a thawelwch y fynwent yn dreiddgar. Y gŵr mawr hwn a roddodd i ddinas Genefa ei chalon yn dewis dinodrwydd. Onid yw hynny'n taro'n chwithig mewn oes pan fo cymaint o fri ar enwogrwydd, a rhaglenni megis 'The X Factor' a 'Strictly Come Dancing' yn ennyn dilyniant anhygoel?

Gall ambell i brofiad dreiddio'r enaid ac aros yn em o drysor ym mlygion y cof. Daeth bore dydd Mawrth, 2 Mehefin 2009 a phrofiad felly i mi. Fydda Calfin wedi dymuno i mi dreulio bore yn chwilio am ei fedd? Go brin; a rhaid cyfaddef i mi deimlo peth euogrwydd yn sefyll yno'n tynnu llun y bedd syml. Ond dyna wnes i, yn gam neu'n gymwys. Un peth sy'n sicr, roedd neges y garreg fach honno yn llawer grymusach na'r hyn a gyfleid gan feini coffa rhwysgfawr y 'cewri' a rannai'r un orffwysfan â John Calfin.

*Y Barchg Gwenda Richards,
Caernarfon.*



Bedd John Calfin